


INERSIMASUMUT SIULEQUT

Atuagaq una atuffassissutaavoq paquminarsinnaasumik ima-qartoq. Aamma oqaloqatigiinnissamut sakkussatut aallarniiluarsinnaavoq. Atuagaq ilaqutariinni nakuusernerup kingunerisinnaasaanik sammisaqartuuvoq.

Atuffassininni meeraq imaassinnaavoq arlaatigut qisuariatog, taamaammat ammaffigiuk; qulequtaasumut tunngasumik arlaannik oqaasertaliiniarsinnaaneramik ikorfartorneratigut. Atuakkap atuareernerata kingorna aamma qulakkeeruk meeraq apeqqutissaqassappat imaluunniit eqqarsaamminik misigissut-simigulluunniit arlaatigut annitassaqassagaluarpat. Tamannami nalinginnaalluarpoq ajunngitsumillu kinguneqartumik pisuunguallaatigiinnarsinnaasassinnik.

*Amalia Lyngge Pedersen
Cand. psych.*

Naja, Qulutanguaq angajoqqaavilu illoqarfissuup Nuup Nuussuar-
taani najugaqarput. Najugaqarfisaanni inissiarpassuupput. Inissiat
majuartarfii anerasaartarfilu assigiaarput. Inissiat akornanni pin-
nguartarfeqarpoq inissiallu ungasinngisaanni taseqarpoq arsaattar-
feeraqarlunilu. Taakani
meerarpassuit naapittar-
put pinnguaqatigeerrat-
tarlutillu.





Naja arfinilinnik ukioqarpoq 1. klassimilu atuartuulluni. Qulutanguaq qulingiluanik ukioqarpoq, 3. klassimilu atuartuulluni. Atuaernerup kingorna fritidshjemmimukartarput. Fritidshjemmiat atuarfiannit ungasinngilaq. Meeqqat tassaniittartut tassaapput 1., 2. aamma 3. klassimi atuartut.

Naja atuaernerermi kingorna angerlarusunnerusaraluarpoq. Tamanna pillugu angajoqqaani uteriiserfiguarterpai, tassami isumaqarami fritidshjemmimi meeqqat amerlavallaartartut nipituallaartarlutillu.

Qulutanguulli fritidshjemminiinnissani nuannarisarpaa. Meeraqatinimi spilleqatigisarpai, soqutigisarnagulu nipituumik erinarsortoqarlunilu nipilersortoqartarnera. Namminermi aamma nipilersoqataasarami.

Najap Qulutanguulli angajoqqaavi kommunip allaffiani sulisarput. Anaanaata ullaakkut meeqqat atuariartuuttarpai, sulereeraangamilu fritidshjemmimut aasarlugit. Ataataat sivi-sunerusumik sulisarpoq, angerlaraangamilu assut qasusarluni

Qasugaangami kiinaa eqisaluttarpoq, isaasalu akornanni itisuumik eqinganeqarluni, silaannarmullu isigisarluni. Taa-maakkaangat Najap Qulutanguulli oqaaseqarnissartik qunugisarpaat.





Ataataat isumagissaaraangami kiinaa eqisalunneq ajorpoq. Meeqqani isigisarpai, nuannaarluni qungujulallunilu. Ataata isumagissaaraangat ullut nuannersuusarput. Taava tamarmik ikioqatigiittarput; igallutik nerriviliorlutillu. Nerereernerullu kingorna spilleqatigiissinnaasarlutik imaluunniit tv-kkut isiginnaagassiat arlaat isiginnaarlugu.

Ataataq ulluni isumaluffigisaani, ilaqutariit tamarmik nipa-ngersimasarput. Taava anaanaq ataata qinngarilersarpaa. Qiviapiloorlugu soorlu ima oqarfigisinnaasarpaa: „Allamukarlutit isumalukkiarniarit!” imaluunniit: „Allanik ilaqutartaarniarit!” Anaana taamatut oqaraangat ataata kamalersarpoq, ilaannikkullu matu matorlullugu anisarluni.





Ulluni taakkunani ataata matu matorlullugu anigaangat, anaana aatsaat iluamik kammasetarpoq. Naja Qulutanguarlu naveertarpai, soorlu imatut oqarfigalugit: „Meerapalaat, qinngaraassi!” imaluunniit: „Suna tamarmi ajortoq!” Anaana taamaakkaangat Qulutanguup anaanani ornittarpaa pakkunniartarlugulu. Ilaannikkut anaana Qulutanguamit pakkunneqarusuttarpoq, ilaannikkulli ajattarpaa nilliaatigalunilu oqarluni: „Attornanga!”



Qulutanguaq anaanamit ajanneqaraangami aliatsattarpoq. Aamma ersilertarpoq, ingammik anaana ajatsipilooraangat, allaat Qulutanguaq natermut uppisillugu, taamaalillunilu annersillugu.



Anaanap ajaqqaarmani ingerlaannaq nikuippoq, kisianni anaanap isimmippaa nilliaffigalugulu: „Attornanga – sianniitsorsuaq!” Taava anaana Qulutanguup sanianut ingeriarluni qissaserpoq, timia tamarmi sajuttuinnanngorluni.

Ataata isumalukkaangat imaluunniit anaana ataatalu kamaati-
leraangata Naja iniminukartarpoq. Taamaalluni anaana ataatalu
isumaqatigiinngillutik anaanap ataata ajammagu, ataata kamaam-
merluni anaana akillugu ajaqqippaa. Kingornatigut ataata anivoq.

Taava Qulutanguup saammarsarniaruttoraani, tamanna piuna-
nagu anaana nilliavoq Qulutanguarlugu isariarlugu.



Naja inimini pinngussanik annoraaminernik meqquluaasalin-
nik uumasuusanik peqaqaaq. Uumasuusammi annoraamernit
aqimaartunik meqquluaasallit katersugarivai. Naja qitsuusaate-
qarpoq, annoraaminernit qaqortumik meqquluaasalik.

Isaasaqarpoq igalaamernit tungujortut. Qernertunik umilik,
attoraannilu kapinartartut. Qitsuusaatini Aqimik ateqartippaa,
Najallu pinngussamini taanna nuannarinerpaasarivaa. Naja un-
nukktut innaleraangami Aqi tutittarpaa. Eqitaartarpaa niaqqunilu
Aqip meqquluaasaanut aqimaartumut attuutivillugu
innartarluni.

